



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8



Modi sorkari kum 7 tsungda mapa aika inyaktetogo: Amit Shah



Israel nung Benjamin Netanyahu yimli laotsu akok

VOL. XVIII NO. 226 (ADOK 226) DIMAPUR

TENTONÜ (MONDAY)

MONUPII (MAY) 31, 2021

₹ 5.00

Nagaland nung COVID-19 putetba ajemogo saka tasur aika

Dimapur, May 30, 2021 (Agencies): Taoba hopta tsungda Nagaland nung COVID-19 putetba ajemogo saka tasur aika liasü, ta Nagaland Health & Family Welfare department-i metetdaksü.

Nagaland nung April ita nungi nisung aika dak COVID-19 puteta 23% nungi 34% akum saka May 23 nungi May 28 tsungda ajema kumogo, ta ketdangsürtemi ashi.

Ajisüaka, tesüiba hopta ka tsungda COVID-19 puteta alir nisung timtiba asü. Tasur ajak agi nisung 84 liasü.

Taoba hopta (May 15-21) tsungda nisung 2062 dak COVID-19 putet saka tan hopta (May 22-28) tsungda nisung 1622 dak dang putet aser iba ajanga ajema akumba sayur.

May 5, 2021 nungi Kohima o Dimapur nung containment zones ozung agütsüba aser ano May 14, 2021 nungi state ajanga total lockdown asüba ajanga

ajema akümer, ta Health & Family Welfare department-isa metetdaksü.

"Lockdown tenzüker hopta ana tsungda anogoshia COVID-19 putetba ajema akümer aser yamaji terabo ajema kumogo saka menatepba jungjunga azüoktsü atema anogo 28 bosa lockdown asütsüla. Dimapur nung COVID-19 putetba kanga ajemogo" ta parnokisa ashi.

Anogo 28 cycle ji June 11 nü tembangtsü aser iba anogo tashi Nagaland ajanga total lockdown asütsü.

Covid wara agi kongshiba sülen tan hopta tsungda nisung 84 asübaaji timtiba asütsü. Tasürtem rongnung parnok 21% shi mozü kidangi arur ghonda 24 tsungda asü aser nisung 10 home isolation nung lia asü, ta H&FW department-isa ashi.

Taküm kum COVID-19 puteta alir nisung 259 süogo aser iba nungi nisung 56 asüba kuli bushisungdangdar, ta department-isa metetdaksü.

TRNYF-i MLA Rupjyoti Kurmi aitsür

Dimapur, May 30 (TYO): May 27, 2021 nü Assam police-i teyari agüja Mariani MLA Rupjyoti Kurmi-i anir nisungtemi tashiyim mapa inyakba atema aoskar, ta Tsürangkong Range Naga Youth Front (TRNYF)-i metetdaksüogo.

"MLA Rupjyoti Kurmi-i arrtsü telungi aiter inyakyim alema Nagaland sensotem amokmerenba video ajanga kuli agütsür. Iba tatalokba indang video ka prokshiba nung kuli tejangja lir anungji iba indang rasaa mashir" ta TRNYF Tir Bendangwati aser Tezüür Shiluyongdang nati sangdong ka nung ashi.

"Rupjyoti Kurmi-i arrtsülen ibala mesükba mapa ya tang mezung atema inyaker masü. Pai mapang shia yimtenren tsütsü tajangzük angutsü atema iba ama inyaka arur. taoba Brihostibarnü pai iba mapa inyakba ya pa nem vote enoktsürtem külakoktsütsü atema inyakba liasü. Election nung takok anguba sülen pai langka inyaker ta sayunüdag iba ya inyak saka tia maka pa tenung ang menükogo" ta TRNYF mendenpurtemi ashi.

"Nagaland aser Assam tsungda arrtsü ken o ya okadak benoka lir ta onoki angateta lir, saka yimten yimsüsür kati public külakokja iba onük atema mapa meinyakdaksütsü. Naga nungeri alemli nungi upper Assam nunger

den aser talisa Ahom Kingdom sülen tesentaktep tajung yua lir" ta parnokisa metetdaksü.

Ibaji Ahom Kingdom indang record nung zülua lir. Burmese nungeri amakba aser ano British nunger aruba sülen Assam nung arua alir nisung tasentemi putiotsü zülushitsü meranger. Asenok ajak India sensotem dang lir aser senso ajak constitution kasa kübok temeten kasa lir, ta TRNYF-isa ashi.

Assamese nungeri putiotsü memeterem dang otsü shitak ashitsü aser item amala nisungtemi tesentaktep raksatsütsü merangba azüoktsü ayongzüker, ta parnokisa ashi.

MLA Rupjyoti Kurmi-i tim masüba mapa meinyaktsü nenshir. Onoki ozung dak amanger aser timtem agütsürtem merenshitsü atema inyaktsü koka lir. Onoki aremzüka ya aibelena mangatetsüla kechiyong onok Naga nunger sobaliba nung nisung ka mekülemer mesüra mesenmetua mamshir, saka onok jashidaksüra ajemajema malitsü, ta Maneni, Nagaland state sorkari Assam den arrtsüa aliba tesemtem border outposts yanglutsü aser May 27 nü amala tensa majurutsü atem mapa inyaktsü metetdaksür, ta TRNYF-isa ashi.

COVID-19 Nagaland: Nisung 192 dak putet; 109 taneptsü angu; 13 asü

Kohima, May 30, 2021 (TYO): Deobarnü Nagaland nung nisung 192 dak COVID-19 putetba züingsema nisung ajak agi 21,563 kumogo.

"Tanü nisung 192 dak COVID-19 aliba putet. Parnokji Dimapur nung 80, Kohima o Mokokchung nung semer asemsem (33), Zunheboto nung 12, Mon nung 11, Phek nung 7, Wokha nung 6, Kiphire, Peren o Tuensang nung asemsem (3) aser Longleng nung 1 lir" ta Health & Family Welfare Minister, S Pangnyu Phom-i metetdaksü.

"Maneni, tanü COVID-19 puteta alir nisung 109 taneptsü angu. Parnokji Dimapur nung 77, Phek nung 17, Kohima nung 10, Kiphire nung 3 aser Mokokchung o Mon nung kaka (1) lir" ta Minister Pangnyu-isa ashi.

Nisung 21,563 rongnungi 15,523 taneptsü nguogo aser tang nisung 5,049 anepaludar, ta

paisa ashi.

"COVID-19 puteta anepalurtem rongnung parnok 144 dak shirangba yimya terara lir, 70 tera shiranga oxygen agir, 66 kanga mejungi oxygen agidar, 31 ICU nung ventilator magji lir aser 10 ventilator nung lir. Nisung 4,728 dakbo shirangba yimya mali" ta Integrated Disease Surveillance Project atema State Nodal Officer, Dr Nyanthung Kikon-i ashi.

Deobarnü COVID-19 puteta alir nisung 13 asü. Parnokji Dimapur nung nisung 8 aser Kiphire, Kohima, Mokokchung, Mon o Phek nung kaka liasü. Parnok züingsema tasur ajak agi nisung 363 kumogo saka parnok 12 bo tanga tashidak ajanga asü, ta paisa ashi.

Nagaland nung COVID-19 puteter nisung 628 tashi tanga state temi ogo, ta Dr Kikon-isa metetdaksü.

Nagaland nung COVID-19 alitsü ta temolung meleme bilemba sample 1,91,564 tendangogo. RT-PCR ajanga 89,389, TrueNat ajanga 55,389 aser Rapid Antigen Test ajanga 46,911 tendang, ta paisa shisem.

"Deobar tashi nung Nagaland nung nisung 2,14,501 nem COVID-19 vaccine indang dose 2,68,628 agütsüogo" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 58,330, healthcare workers 15,482, arishi kum 45 temapur 1,21,961 aser arishi kum 18 nungi 44 tsungda alir 18,728 lir, ta paisa ashi.

"Vaccine agirtem rongnungi nisung 54,127-i vaccine indang dose anaprong agiogo. Parnokji frontline workers 27,970, healthcare workers 10,180 aser arishi kum 45 ser temapur 15,977 lir" ta Dr Thurr-isa metetdaksü.

IHRC-i Centre aser ULFA(I) tsungda yaritepnür

Guwahati, May 30, 2021 (Agencies): International Human Rights Council (IHRC)-i ULFA(I) aser Centre tsungda tiyongtsü nung yariteptsü metetdaksüogo. UHRC ya United Nations-i agizüka aliba telok ka lir.

IHRC national general secretary Kamal Raj Chetry-i ULFA(I) Commander-in-Chief Pares Baruah dangi iba atema shidi ka zülü.

"Nai sorkar (Assam aser Centre) den olemteptsü molunga

aliba osang angashia onok kanga pelar" ta IHRC-i Pares Baruah dang ashi.

"Olemtept alitsü lemetebaji tejakleni aotsü atema tamendakdak lir. Taoba kum 40 tsungda teraksa aika ajuruogo aser anatsülen nungi tasütait sepai aika taküm samaogo" ta IHRC-isa ashi.

"Anungji, onoki United Liberation Front of Assam-Independent (ULFA-I) Commander-in-Chief Pares Barua, Chief Minister Himanta

Biswa Sarma-i aniba Assam sorkar aser Prime Minister Narendra Modi-i aniba Centre sorkar dang telemteba ka agitsü aser raratepba anentsü mepishir. Iba ajanga Assam nung dang masü saka North-East aser India nung yimjung bener arutsü" ta shidi nungsa metetdaksü.

"Tanü asenoki inyaka yutsüba ajanga tarutsü putu ajangzüktsü. IHRC-i telok ana tsungda tiyongtsü nung yariteptsü molunga lir" ta Kamal Raj Chetry-isa ashi.

Myanmar nung PREPAK tanishir 3 khaset

Imphal, May 30, 2021 (Agencies): Manipur nung telungpur telok People's Revolutionary Party of Kangleipak (PREPAK) nung tongti tanishir asem Myanmar nung tepset ta osang angazüker.

Myanmar kübok Chin province nung PREPAK 'acting chairman' Khumujam Ratan, 'organisation secretary' Mayengbam Joychand aser ano tanishir ka Rajkumar Ramananda nunger parnok

telok sasep nung mepetmesü ka adoka tepset.

Par asem indang mang ya taoba hopta min ka nung remogo.

PREPAK nung tanishir Aheiba Angom-i tuyuba nung ajemdaker par asem tepset ta osang ajanga ashir.

Angom yagi PREPAK indang Rs 5 crore tim mesüi amshiba atema tanishir asem jagi bushisungdang asütsü tetuyuba agütsü. Ajisüaka, pai ozung alema mapa inyakba

miimbangtsü mechi nung tanishir asem May 23 nü gari lendong ka nung asü ta olulu ka prokshi.

Par asem indang mangji lungren tarok ka nung rema liasü aser parnok telok indang tesep nung asüpila sentong agia liasü, ta ketdangsürtemi ashi.

Ajisüaka, PREPAK tanishir asemji parnok telok sasep nung mangatettep ka adoka tepset ta kuli ngutetogo ta ketdangsürtemisa metetdaksü.

Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



Sorkar ketdang mesüettra menden nungi alutsüla: NPP Nagaland

Dimapur, Monupii/May 30

(TYO): Tawa ang tasen shimtetba Doctor aser frontline worker tem mapang shidak nung ita sen magütsüba timtem temai adokba atema, nüburtem ajungtsü mechi pei takum bendanga agütsür tashidak wara tamajung den tasü ita tongpang raratem kechiba yamai sensamasa amshir, ta NPP Nagaland State ajanga state sorkar aser Health & Family Welfare department dang asüngdaga liasü.

Nüburtem takum kumzüksü asoshi pei takum bendanga agütsür nem pei takum alitsü temeden magütsüba ya tesüngmangtsüka aser temenüntsüka lir. Parnok nem itasen magütsüba ya shidak agibo mapa tamajung inyakba lir. Item tasü tait frontline worker nem ya ang taa mezüngbuba agütsütsüla. Sorkari parnok nem chiyongtsüa magütsür, mapang shidak nunga parnok taa magütsür saka anibelem mesasai tasü ita nokdaksü imlar, ta NPP Nagaland State sangdong ajanga ashi.

Ibai sepaitem nem nok-o-nü magütsü aser choyongtsü maden rarai yokba amai lir. Doctor tem aika meta talang nung oa pei kibong nungi pila lir,

parnoki pei kibong khuret abenba kisüng masü saka nüburtem anema yutsütsü khureta abener. Aser par mapa asoshi kecha magütsüi ano parnok dak teimla tulu ayuba ya khuret tulu alitsü, ta ashi.

Asenoki doctor, nurse aser frontline worker tem dang pelaba tebang agi rasaa meshitettsü, shirnok tang asen nüburtem anitsü tesangwa lir. Onok doctor aser frontline worker den lir aser sorkari tim masüba mapa inyakba atema tapet mera agütsütsü akhanger, ta NPP Nagaland State sangdong ajangasa ashi.

Iba dak alia, tang aliba sorkari tang tensa ya ketdangtsütsü mokokra menden nungi alua akoktsüpur aser tejangrar nem anidaktsüba tajungba asütsü.

Pei atema kisüng bilemba lar ka ama ketdangtsürtemi nüburtem takum lendongbang nung meyutsütsüla. Temaba jenjang nung alirtemi asen frontline worker tim atemba mangatetra, parnoki civil society tem dang teyari asüngdangtsüla, kechiaser senotsü shidak nung ochishia amshira tasütait frontline worker temi timtem ajuruba ajemdaksütsü atema angati senotsü tenlatsü molunga alitsü südi ta amanger, ta

sangdong ajanga ashi.

Lockdown ajanga metokmeperi adokba atema sorkari mera agiba nunga temolung malemer, aser ano tang lockdown atsülanger asünung, teyari nüngdaka alir aser timtem ajangshia alirtem atema sentong tajung karbo yanglua ali asü masü, ta NPP ajanga asüngdang.

Anogoshi aayangertem nem iba lockdown ajanga kanga khuret tali agütsür ta ajaki meteta lir, aser iba atema sorkari par nüngdakba peritsür asü? Parnok nem nüngdakba osettem angati aser kasa agütsür asü? Item teyari ya yimdak-yimtsung tonga aor asü? ta asüngdang.

Nüburtem ya virus agi masü saka makamait aser aya agi timba asür. Sorkari teyari nüngdaka alirtem atema kecha meinyaki timtem ajak virus nung dang tongloksüla masü, ta ashi.

NPP ajanga sangdong nung, onoki frontline worker ajak dang maneni pelaba lemsateper aser parnok kibongtem kumzüksü yujang ta sarasademtsür, ta ashi. NGO, Civil society, Institution balala aser kija kibong shirnokisa pei akokba yari nung nübur den yariteper, nenok dang pelaba lemsateper, ta sangdong ajangasa ashi.

COVID-19 mapang moko achiba majung: Dr. C Tetseo

Dimapur, Monupii/May 30

(TYO): World Health Organisation ajanga World No Tobacco Day 2021 atema "Commit to quit" ya omen asütsü shimtetogo, kechiaser alima nung COVID-19 tashidak wara agi alima ajunga asüngba sülen moko achirtemi moko yutsütsü teyari bushir.

Ibai talisa moko achirtem dak COVID-19 virus atemba mapang parnok dak timtem tamajungba aser tali adoker, ta Joint director aser State Nodal Officer NTCP, Dr. C Tetseo-i ashi.

Social media aser journal kar nung moko achirtem dak COVID-19 tashidak atemtsü ya tasakba, ta prokshiba ya tai lir.

Moko achiba ajanga tepokbok raksar aser immunity tashi mait kumdaksür aliba agi coronavirus tashidak den raratsü ya tasakba akumtsü. Moko achirtemi virus ya teka nungi tebangi temelaba bener aotsü maangka agütsür, kechiaser parnoki teti tebangmechi nung kongshir, ta pai ashi.

WHO ajanga moko achiba nung rangloker, saka moko, Gutka aser sali (paan) mangemba nunga timtem kasa lir aser nüburtemi amshiba tesem aser kidang metzü tapi agi indokba ajanga mesen aliba tzüsem prokshidaktsür, ta ashi.

Ibai lendong tulu lir, kechiaser sali-moko achiba ya

Nagaland nung nisung aika atema mapang indoktsü tajungtiba lir.

Mokozü madokba moko oset amshirtemi parnok indang mask menener aser aiben agizüksüsa akumer, anungji tashidak menatsü maangka tali agütsür. COVID-19 tashidak anogoshi timba akumer aser talangka asen den alitsü, anungji asenok kumdanga alitsüla aser moko achiba yimya melentsüla, koba agi asen rongsen dang chireper aser temelen tashidak dang agütsür, ta Dr Tetseo-i ashi.

Moko ya mapang ajak atema tamajung saka tang ama COVID-19 tashidak wara agi alima ajunga sünger aliba mapangsa tamajungtiba lir, ta pai ashi

Minister Temjen Imna Along dang pelar: JSTM

Dimapur, Monupii/May 30

(TYO): Minister, Higher Education & Tribal Affairs, aser BJP Nagaland tir, Temjen Imna Along Longkumer ajanga nübur ajangzüksü atema constituency nung dang masü Naga lima tesem ajaklen mapa tajung jenti inyakba angudang aser angashidang pelar, ta Japukong Senso Telongjem Mangkolemba (JSTM) sangdong ka ajanga ashi.

Alima ajunga nung tashidak wara agi ratamata animesüngzükseti aliba mapang, pai 30th Alongtaki Constituency nübur timtem ajiteta yimtsung ajak nem COVID-19 wara mozü aser nüngdakba oset teyari tenlaba mapa tajung asoshi pelar.

Talisa 30th Alongtaki

Constituency pur shibasa tia makai COVID-19 agi shirangdir angati temang anepaluba den angati ambulance teyari agütsütsü molungsoa shisatetba ya, lenir dak nübur aria meimba tangatetba molungsentü tajung ajiteter, ta JSTM tir Tinuniken aser tezülur Tongpangrepba nati sangdong ajanga ashi.

Constituency pur kecha tebandang makai ajak nem iba temeim mapa tajung inyaksü leman lapoka yutsüba asoshi Japukong Senso Telongjem Mangkolemba sanger ajaki kanga dang pelaba lemsateper. Tsungremi lenir Temjen Imna Along Longkumer takum maneni azük-aro, anema aliba aser arishi nübur asoshi tenung nung jalok medem moajangma, ta sangdong ajangasa ashi.

CTC website lapokogo



Rev. Dr. A Temjen Jamir, CTC Principal-i ctc website lapoktsüba mapang agiba noksa nung angur.

Mokokchung, May 30

(TYO): Alima den jangyu medema Clark Theological College (CTC) Aolijen, Mokokchung indang website May 26, 2021 nü Rev. Dr. A. Temjen Jamir, CTC Principal ajanga lapoktsüo, ta CTC sangdong ka ajanga metetdaksü.

"Kodangsa asenoki mapa tajung ka inyakdir, ibaji Tsungrem sentsuwangshi asoshi lir ta shia Tebu, Techir aser Tanela Temeshi tenung nung CTC faculty aser staff tsüngdang lapoktsü. Iba website ajanga CTC students, alumni,

kija, kibong, arogotem aser nüburtem den CTC tenzüksüba mapa aser mangdang külemi lemsatepa inyaka aotsü tamang sarasadem lir, ta pai shisem.

Iba website lapokba den külemi Wi-Fi aser LAN connection inokba ajanga tarutsü nung CTC digital library küma amshitsü nükla lir. Rev. Dr. A. Tali Ao, Academic Dean, sentong lenir liasü aser Dr. Nungshi Tzüdir-i bendanga agüja sarasadem. CTC osangtsüsang metetjemtsü asoshi iba website www.ctcnagaland.org.in semdangtsü akok.

Dimapur Langpangkong Senso Telongjemi aitsür

Dimapur, Monupii/May 30

(TYO): Sematilla nung asaa arishi küm 10 tanur ka dak Lipokchuba, S/o Rongsennuken aser pa kinungtsü Bendangnaro nati züka merenshiba osang angashia Dimapur Langpangkong Senso Telongjem (DLST) kanga aoksar aser süngmanger, ta DLST tir S.N. Meren aser tongti zülur Sentimeren nati sangdong ka ajanga ashi.

Tanur ka dak pa anepalua reprangtsüpuri ozüing khenyongi mezüngshi aser tejakleni aoba nisung meimchir tangatetba tamendak dak aibelenata tashiyim amshia kangasa mejungi yirutsüba ya kangasa tim masüba mapa ka lir, ta sangdong ajanga ashi.

Shi temang nung zübu kettsüba aser meshidaki

amshiba nungi tanur ka kumzüksü alitsü tashi temeden lir. Yimya kecha nunga tashiyim amshiba nisung meimchir molungsentü agi magizükset. Aser iba ama yimya amshiba ya tangatetba aliba lokti ka nung temeden maka, anungji DLST ajanga khukhua aitsür aser tarutsü nunga tanur anema mapa tamajung inyakba atema tatok magütsütsü.

Tila tanur dak tashiyim amshia züka merenshiba ya nisung ka takum alitsü temeden nung aibelenba lir, koba Arrla 21 kübok tongtipang temeden ka lir. Anungji tila tanurtem takum wazüka ayutsü aser ajungtsü mechi Nagaland sorkari constitution nung mela aliba shidak inyaksü ajungshir, ta DLST sangdong ajangasa ashi.



Mokokchung DC aser District Task Force, Chairman, Limawabang Jamir aser Mokokchung S.P Vishal IPS nati May 30 nü Mokokchung Covid-19 Hospital semdangba mapang tena den CMO Dr. Chubala aser IMDH M.S Dr. Limatula na densema angur. Mokokchung DC o SP nati Covid-19 hospital nung duty inyaker doctor aser nurse-tem dang timtem arema pei sempet tajungtiba agi shirangertem anepalutsü asoshi ajungshia liasü. District Administration-isa Covid-19 hospital nung duty inyaker tem temang nung teyari agütsüba chiyungtsü kar agütsü. Mokokchung, May 30, 2021

Aizawl nung 'total lockdown' atsülanger



Aizawl, May 30, 2021 (Agencies): Honibarnü Mizoram sorkari Aizawl Municipal Corporation (AMC) nungi anogo 7 lockdown atsülangtsü telemtetba agiogo. Covid-19 wara menatepa aoba azioktsü atema May 10 nungi tenzüka Aizawl aser tanga district headquarter tem nung total lockdown lir.

Item tesem nung total lockdown ya anaben tashi atsülangogo aser May 31, 2021 anepdang 4:00 ako nung agientsü.

Ajisüaka, tangbo AMC nungang total lockdown atsülangogo.

Honibarnü Mizoram ajanga agütsüba tetuyuba nung, tesüiba anogo ishika nungi AMC tesem nung tashidak timtiba puteta liasü, ta shia lir.

"Healthcare facility tem nung khuret pongbadaktsütsü aser iba wara prokba azioktsü asoshi AMC nung ano anogo 7 tashi lockdown mapang

atsülangtsür" ta sorkari ashi. Iba tetuyuba tasen nung lockdown mapang AMC tesem nung alirtem shinga pei kidang mesüra kima compund nungi ayazüka maotsü ozüng agüja lir.

AMC dak alaka tanga tesemtem atema, deputy commissioner mesüra district magistrate temi pei pei tata tesem nung Covid-19 tensa asadanger sülen, nungdak adok nungang tenokdangba kar mesüra lockdown amenoktsü ta tetuyuba nungsa shia lir.

State kübok tekülemdak, shisaliok reju, public park, picnic spot, movie theatre, gymnasium, community hall, restaurant, shopping complex aser mall ajak maneni shibangtsü.

Item dak alia Aizawl nung lockdown atsülangba mapang, sorkar office kar dak alaka, tanüngba sorkar office ajunga shibangtsü.

Ajisüaka, AMC tema nunga

aliba tesemtem kübok sorkar office aser commercial bank tem Covid-19 inyakyim ama lapoktsü.

Mizoram tesem ajungalen asüpila sentong aser kiyimba sentong nung nisung 30 dang adentsü melar.

Medical rongdak nungdak aser koda masüba mepaidoktetba maparen dak alaka, Intra-state mesüra inter-village senzüsenbongba nokdang.

Maneni, Honibarnü Mizoram nung nisung 283 dak Covid-19 tashidak tasen puteta, state nung iba tashidak tejangja puteter nisung 11,659 kümogo.

Kasa anogo, nisung 118 shi taneptsü ngur sülen parnok Covid-19 Care Centre balala nungi yokadokogo.

Tang, Mizoram nung nisung 2,863 dak COVID-19 agi shirangdar aser nisung 8,761 tashi taneptsü nguogo. State nung iba wara adoker külen nungi nisung 35 taküm samaogo.

Shillong nung Covid puteta alir apuani jena ao

Shillong, May 30, 2021 (Agencies): Shillong nung apuani na ajuruteptsü atema ka Covid-19 hospital aser ka quarantine facility nungi jena ao.

Tenaprong dak coronavirus puteta lir aser tetsürlaji Shillong Civil Covid hospital nung anioka liasü saka lai Laitumkhrah market nung la kinungbo den ajuruteptsü atema mozü ki toktsür jena ao.

La kinungbo ya Covid agi

tera shiranger aser iba jagi quarantine centre nung ayu.

Tena den külemi medemer ka Laitumkhrah kübok tesem balala nungi puogo.

Tebursangji sample test asütsü atema anir aodang 108 ambulance nungi pungzüker jena ao.

"Tebutsüji civil hospital nungi jena ao. La ya category 'C' aser teubajji category 'B' lir. Tenaprongi mask meinok liasü

aser aketer" ta Congress MLA M Ampareen Lyngdoh-i ashi.

Tena külemi ajuruteptsüba agi iba ya inyak, ta Lyngdoh-isa ashi.

"Tena tekolok nung timtem alitsü akok. Kechiyong nüji meimchir kati tensa angateta lir. Covid-19 puteter ka mozü kidang mesüra kidang anogo 10 bosa balaka alitsüla" ta Deputy Chief Minister Prestone Tynsoing-ia ashi.



Mizoram nung African Swine Fever (ASF) ajanga ak 4,650 süogo ta Honibarnü Animal Husbandry & Veterinary Science joint director, Dr. Lalhmingthanga-i metetdaksü. Taküm March ita nungi Mizoram nung ASF wara adoka prokshi aser yashi ak 40 asüba züngsema ak 4,650 asü aser Rs. 18.60 crore akoksaogo ta paisa ashi. Mizoram kübok district 9 - Aizawl, Lunglei, Mamit, Serchhip, Lawngtlai, Khawzawl, Hnahthial, Siaha aser Champhai nung iba wara lir. (Aizawl, May 30)

Tripura nung COVID-19 agi tsürabur asüba tanurtem atema scheme ka tenzüksür

Agartala, May 30, 2021 (Agencies): COVID-19 agi tsürabur asüba tanurtem atema Tripura Chief Minister Biplab Deb-i scheme tasen ka tenzüksüogo.

"Mukhya Mantri Balya Seva Prakalpa" ta nungja agütsüba scheme ya Honibarnü Tripura CM-i tenzüksüogo.

"Tanurtem shirnok tsürabur anaprongla COVID-19 agi asü, item tanurtem jangjatsü aser bushitsü nükjidong nung sorkari iba mapatong tenzüksür" ta Deb-i ashi.

"Tang tashi nung Tripura kübok tanurtem, shirnok tsürabur Covid-19 agi süogo, item tanur indang data sorkari bendena mali. Ajisüaka, State sorkar indang ketdangsurtemi Covid-19 agi tsürabur süadoker alir tanurtem jangjatsü atema survey ka agitsü," ta paisa ashi.

Iba scheme tasenba ajanga, tanurtem shirnok orphanage

nung amongtsü, parnok atema senotsü ajak Tripura sorkari agütsütsü.

Deb-isa ashiba agi, tanurtem shirnok pei kinunger den alitsü, parnok arishi küm 18 tashi ita shia State Sorkari sen 3,500 agütsütsü. Iba den bendenloksema, parnok school angati züngdaktsütsü.

Tanur tetsür atema iba scheme maongka den la school züngtemba sülen, la kibong akümtsü atema sen 50, 000 teyari agütsütsü.

Class X board examination nung takok anguba sülen, parnok nem Laptop aser tablet agütsütsü, ta CM Deb-isa metetdaksüogo.

Maneni, Tripura nung vaccination maparen dak sendakba nung Chief Minister Biplab Deb-i "State nung nütsüng yongsük shilem 100 nungi nütsüng shilem 39.6 tashi vaccine agiogo," ta ashi.



Assam kübok Guwahati nung police-i National Liberation Front of Bodoland (NLFB) tanishir ka puogo. Iba nisung ya NLFB General Secretary Dipak Choudhury ta jangjaogo aser pa ya Salbari Hills, Noonmati nung apu. Dipak Choudhury-i taoba ita asem tashi kinunger ka ka kidang jenoka liasü aser pai Rapido rider ama mimbanger liyonga aru saka Guwahati Police indang Crime Branch-i pa apu. (Guwahati, May 30)

Assam nung menoknok anak

Guwahati, May 30, 2021 (Agencies): Deobar osang kecha mali. Tesüiba ita ishika nungi nikongdang 2:23 ako meta Assam nung menoknok anak nung menoknok noka arur.

Menoknokji Ritcher Scale nung 4.1 ta asadangteta liasü. Iba osang ya National Center for Seismology (NCS)-i metetdaksü.

Menoknokji ali telunglen kilometer 16 shi irr anak, ta NCS-i ashi.

Assam kübok Sonitpur District nung Tezpur anüolen tsütsü kilometer 40 pilaa orr lir menoknokji anak, ta National Center for Seismology-isa metetdaksü.

Ajisüaka, iba menoknok ajanga kiojen raksatsüba mesüra nisung taküm samaba

osang kecha mali. Tesüiba ita ishika nungi Northeast kübok tesem balala nung menoknok noka arur.

May 29, anepdang 1:29 ako meta Meghalaya nunga 3.5 magnitude tashi nung menoknok ka anak.

Iba menoknok ya Shillong anüolen kilometer 11 shi pilar anak.

Taoba Deobarnü Manipur nunga 4.3 magnitude tashi nung menoknok ka anak

Iba menoknok ya Manipur kübok Ukhrul nungi kilometer 49 pila orr adok.

Ano, May 19, 2021 nü Assam nung magnitude 3.2 tashi nung menoknok ka anak.



TIR YIMYIM YIMOBILEM (EDITORIAL)

DIMAPUR TENTONÜ, MONUPII(MAY) 31, 2021

Ya mapang tajung !

Alima nung ya Covid ama tashidak wara aliyonga maliyonga tashidak tejentem toa lir aser asenok libaliro yari ano tashidak tasena poktetpet poktettsü, anungji nisunga asütsü saka ano tasoa asotsü. Anungji, tang ama tashidak tasen aser tesashi poktetba ajanga asenok akhi ama lokti mesentepi aser kazülongzüa mesenzüi pei kidang aser pei mapa nung peisasa azüoka aliba mapang ya, tajung tsütsü bilemdangra, ibai mapang kanga tajung lir. Ashiko, kibong karbo kibong kümer apuani nata kenüa kidang külemi junga memongdangba purtema alitsü. Iba amaji ano kibong aika nung tsüraburtem o tanurtem na kidang külemibo kenüa kaonunga melidang aser majurutepdang alitsüa akok. Ano, arogo aser Tsüngremer wadang tapu balala nung inyakertema, alima nung kibong kümer alir asünungji aiben pei kibong nungdak jajatsüsa akümer, idangji Laishiba bushitsübaji yutsür khenkhenbo kinungertem den sarasadem mapanga magitetsüsa tenjir alitsü. Ashiko, iba ama alima khuret aser nungdaktem agi sermon-a junga merenemtetsüsa anogotema ajurur alitsü. Yimten nung yimsüsür aser ketdangsertema akhi anogotem nungbo nübortem asoshi ajaklen mapa ajak shitak inyaka alir amato bilema zübazüba benjongbentsü amongtsüba len dang temulung tagütsüba ser inyaka alitsüa akok. Item ajakji tang ajungbenaka anendaktsür, asen kidang asen kinunger ajak külemi ajurutepa amongtsüba mapang tajung ka, tang asenoki ajurur. Ibai kaketshirtem asoshi dang masü saka tesayurtem asoshi text book dang masü saka tanga kakettem dena bener arua lesson bushia renemtsüba mapang lir. Iba kasaji arogo aser Tsüngrem tenzüka mapatem nung alirtem asoshia ibai asentenshiba mapang tajung ka lir. Tangbo tanga senzusenpongtsü nungdak kanga madoker aser asena maor aser tangartema marur, anungji kecha meinprong mali, kidang anepdang nungi sarasadema kaketsa kaket zünga Lai o teratet bushitsüba sodi mapang tajung ka Tsüngremi agütsüogo ta bilemdi. Tang mapangba ya Tsüngrem tenzükertem asoshi alima academic nung masü saka Spiritual Academy nung doctorate angutsüba mapang lir ta bilemer. Kasaji, yimten yimsüsür aser ketdangsertem asoshia akhi mapang government sen agi inyakba ajak pei sen agi inyaktsü amai bilema nübortem tenüngsanga jembiba mapatem to shitakba inyaka ali asü mali ta mounüyonga orr reprangdangba aser inyaktsütsüsa akümba mapang tajung ka agi menepogo. Akhidangbo, zünger mapa mangua ta chiyongli kimalen senzür arua mejangli aser mobile - mobile dang amshia kazüli asübato, tangbo nia küsasa kechi inyaktsü (?) ta bilemdangba shisatsü tajung ka lanurtem mulungjangi aruogo. Iba jagi aikati online business tenzüker aser ano aikati atsü (garden) anepalur aser aikati soruchioker. Nütsüng nübortem asoshia akhidangbo mapa - mapa arishiba agi sarasademtsübjibo yutsür chiyongtsüa mapang mangu aritepba to , tangbo ibai kidang dang masü saka tenla kidangi orr pei kija asüyonga kinük ka nung mechioker sarasadema amongtsüba mapang tajungtibaji asütsü. Covid-19 tashidak ya neptsübangtsü ajanga menatempa aoba tashidak ka asünungji, nisung o nisung na tangshitepa ajuruteptsü aser lokti senden tulu alitsü memelar dang ashi, tenla ki shibangtsüba mesüra sarasadem masütsüba indang ozüng agütsür masü, anungji arogo shia nung amangba purtem taruner arua sarasademtsüsa tenla kibo teti lapoka yutsütsüla. Atangji, peisasa tali kümdangtsü atema tenla kima sanitizer aser teka metsüktsü tzü den sapon tzü (handwash) dena yutsütsü tim. Tanüla nung tejangra marem tenla kidangi mapang kasa nung nisung aika senteptsüsa arura, idangjiang mapang lemsatsütsüsa adoktsü. Aji oda, iba mapang ya nisung kar kidang Tsüngrem o tali tarokba nung angatetsü meranga sarasadema Laishiba bushir aser ano kar tenla kidang sarasadem ta asüba mapang ka tenzüktet nungbo, Covid Lockdown mapang masü saka tanüla nung asentenshiba mapang ka asütsü. Alima nung anü dang apua majung aser tzünglu dang arua majung saka anü puli, tzünglu aruli ta asüba agi alima nung taküm alirtem nungdak perir. Iba kasaji alima tensa mapanga teti tajung dangbo masütsü mesüra tamajung dangbo masü saka tajung sülen tamajung aser tamajung sülen tajung ta melentepa ajurutsü. Item tensa tia ajakji tali ashir asoshibo mapang tajung dang asütsü. Alima nung mapang tajung ajakji asen asoshi dangbo masü saka tamajung nungjia asen shilem lir. Ibai angateta kodang asenoki tajung tajung dang inyaktsü bilemdir, asen asoshibo mapang tajung asütsü. Mapang tajungji tashidak wara aser timtem maliba mapang masü saka mapa tajung inyakba mapangji mapang tajung lir.

OLEMSABANG



Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA

E-mail : abamimpur7@yahoo.co.in

Website: www.abamimpur.org

☎ : 0369-2262202 (O)

Arogotem dang Tepelaba Ola

COVID-19 wara pokteter mapang talangka arur. Iba wara ajanga nübortem jendi taküm laludaktsüdagi. Anogoshia zünger mezüngma tasüba osangtem angashir. Nisungtem mulungjang nung tetsübu aser tatenten tanela agi sünga lir. Tasüba ajuruba kibongtem nung asükho khuret bener alirtem nem Tsüngremi tesünep agüjangma ta sarasademtsür. Iba wara koktetsü asoshi sorkar bangdak nung alirtemi anir Doctors, Nurses, District Task Force, Frontline Workers, Civil Societies, ano aika, ajaki merangtepba inyakba angudang pelar.

Item ajak rongnung Ao arogotem dang kangasa pelar ta shiner. COVID-19 wara pokteter küm anabuba rarayonga arudang arogotemi temeim mapatem aika inyaka arudagi. Ao arogotemi rongsen, mapang, nübu, tangatetba shisatsü aser tani tebelem jendi arema sorkar den teka amteper shilem agia arudagi. Lim arogo shiai pei alidak tesem den peta rongsen jendi endoka mapatem inyaker. Arogo tulu/tila, town/yimtsüng ta tebandang makai pei akok yari ajaklen mapa tajung inyakbatem angur. Talisa arogo nung Pastori anir tenzükertemi teyari nungdaka aliba purtem bushia oa arogo senpong nungi mokoroi teyari agüja arur. Tepelatsü kaji, tanü Ao arogotem nung takotet aser bendanga agütsüba Pastor aser toklanga tenzüker aika moaja lir. Lockdown mapang tesem aika nung lokti tekülem magitetsüsa akümdang parnoki nübortem rongjena metoktsüi media balala ajanga tapet sentong yanglur Tsüngrem o agi mesüa aruba ya temoatsü ulura. Tanü asen tendak kipoksemi aotsüa tsübuteper, shiranger semdangi aotsüa tsübur, COVID hospital anasai aotsübo asükjang meronga bilemer. Talisa COVID-19 agi asürtem anasai aotsüji onsara tsübuteper. Saka iba ama mapang Pastortem jenjang ken bilemdangdi. Tetsübu aser tarendak liaka, Tsüngremi ibai inyaktsü jatet ta angatet nung taküm bendanga agütsür COVID hospital tashi shirangertem semdanga aoba den asü pila (funeral) tashi tasü ita agitsür. Item Pastortem yaa pei kibong lir. Karbo kidang tanur tilatem lir saka taküm bendanga agüja pei kidang memejangi nungdaka alirtem yaritsü mulungtetbatem lir.

Meimchir mulung asüdak maka. Abensa-a inyaker ama asüyonga tang ama mapang mabensaba onsara adoker. Anungji amangbapurtem ajaki Ao arogotemi mapa tajung inyakba asoshi peladi. Pastori anir tenzükertemi taküm bendanga agüja inyakba asoshi peladi aser parnok atema sarasademtsüdi.

COVID-19 wara kodang koktetsü ashitsü makok. Tsüngrem dak imlatsü dak alema tanga lenmang mali. Maneni arogotemi pei aliba tesem den peta tamangertem tamang nung akanga alitsü asoshi tapet sentong yanglua agitsü ajungshir. Khristar arogotem lungjemer Tsüngremi imlaba atalokdaktsütsü maneni meranga inyakdi.

(Rev. Dr. Mar Pongener)

Executive Secretary, ABAM

May 30, 2021

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Youth With A Mission (YWAM) lenir, Floyd McClung alima nungi pilaogo



Youth With A Mission (YWAM) nung taoba mapang International executive director, Floyd McClung aser pa kinungtsü Sally na tangokba noksa nung angur.

May 30, 2021: Khristan mission lenir aser kaketzülur, Floyd McClung kum pongu tashi shiranga aruba sülen alima nungi pilaogo; pa arrshi kum 75 liasü.

Floyd kinungtsü Sally-i, "Pa joko shi nung timmatemer. Künü anogo ni pa (kodak nung) ajurutsü," ta metetdaksü.

Floyd Lee McClung Jr. America nung aso; pa missions lenir ka, sayutsüngir ka aser 'Father Heart of God' kaketzülur. Pa mapang talangka shiranga aruba sülen Honibarnü-May 29, 2021 nü Cape Town, South Africa nung asü.

Pa 2016 kum nungi shiranga hospital nung monga liasü aser kum pongu dak tema pai o mejembiteti aruogo.

Pa Youth With A Mission (YWAM) nung kum 35 inyakba mapang iba mission nung kum 8 tashi International executive director liasü. YWAM dak alia pa kinungtsü tenati All Nations tenzüka liasü. All Nations-i alima tesem balala nung leadership-training agütsüba den külemi iba tentet ya Arogo tasen tenzüksüba network ka lir.

Pa asüba mangyima 24/7 Prayer nungi Pete Greig-i, "Tanep kü tesayur aser tanela tsütsü tsürabur Floyd McClung Yisu den alitsü atema kidangi ogo. Alima nung nisung tajungtibatem rongnung pa ka liasü," ta lemsatep.

"Pa ya alima nung lenir ka,

tanela tsütsü mongin ka, kaketzülur tajung ka, taoba mapang YWAM nung International Director, tembar ka aser nisung aika atema tanela tsütsü tsürabur ka liasü. Ni arrshi kum 17 asüba mapang nung Floyd-i züluba kaketzülur 'The Father Heart of God' ajanga kü taküm nung temelenshi adok," ta Pete-i social media ajanga lemsatep.

Pete Greig-i America nung 24/7 Prayer tenzüka mapang nung Floyd aser Sally McClung na den kum ka shi tena den monga liasü.

Floyd McClung kinungtsü, Sally-i parnok indang website ajanga, "Honibar, May 29 anepdang 1:15 ako nung kü kinungbu Floyd pai miemsang Yisu den alitsü atema ogo. Mashie mapang ka nung pa asütsü ta ni meteta liasü saka pa asüba ajanga kü melung raksa. Kü arrshi piyong ni pa menungratsü. Ozü chirnurtemi ashiba ama pa ya ni arrshi kum 16 asüba mapang nungi kü taküm nung kü meimsang liasü. Pa joko timmatemer ta meteta ni pelar. Künü anogo ni pa (kodak nung) ajurutsü," ta metetdaksü.

Floyd aser Sally na 1965 kum Las Vegas nung mission mapa ka inyakba mapang nung ajurutepa liasü. Mission mapa inyakba mapang nung meimteptsü memelar, anungji Jamaica nung aliba mapang

nung ang Floyd-i pa den aniasungtsü asungdanga shidi ka ajanga Sally dang asungdang, aser kasa anogo nungjisa lai melunga telangzüba agütsü. Iba sülen kum ka lir tena kibong aküm aser mission mapa inyaktsü atema Caribbean-i oa liasü.

Kum 50 tashi Tsüngrem tenzüka wadang inyakba mapang nung Floyd McClung Africa, Asia, Europe aser North America nung ali aser kanga nungtugu kaketzülur 'The Father Heart of God' densema pai kaketzülur 18 tashi zülü.

YWAM tenzükertem- Loren aser Darlene Cunningham nati, "Floyd McClung ya foundation yanglutsür tongtibang lenir ka liasü aser YWAM nung kum aika inyakogo. Pai Afghanistan, India, Nepal, Netherlands, California aser Colorado densema tesem aika nung inyakogo. Pa taküm, pai sayuba aser pai züluba kaketzülur ajanga YWAM nung temelenshi kanga adok," ta metetdaksü.

Pa kinungtsü Sally tena kibong kümer kum 54 jungogo. Pai kinungtsü den jala, Misha Thompson aser jabaso, Matthew McClung na den semchir aika toktsür pilaogo.

Tang coronavirus wara aliba agi lokti adenshia asüpila sentong magitsü saka pa nungtem nung video ka adoka lemsateptsü.

Vietnam nung aliba Arogo ka nung nisung 85 dak Covid putet

May 30, 2021: Vietnam nung yimti tulutiba, Ho Chi Minh City nung aliba Protestant Arogo ka nung nisung 85 dak coronavirus tashidak putetba sülen linük tesem ajaklen Arogo sentongtem nokdangogo, ta health ministry-i metetdaksü.

Revival Ekklesia Mission Arogo nung tamangertem kanga anasatepa mener lokti ken aten aser parnok aikati mask magi liasü. Iba Arogo nung nisung 85 dak coronavirus putetba sülen linük tesem ajaklen tamangba yimsü dak sendakba sentong ajak nokdangogo.

Tongtibang yimitem nung ketdangseremi lokti adenshia nokdang, public park shibangdaksüba den külemi restaurants, bars, clubs aser spas ajak shiangdaksüogo.

Vietnam nung scientist temi coronavirus variant tasen ka putetogo; iba variant ya India aser UK na nung mezüng puteta liasü, ta health minister-i metetdaksü.

Health Minister, Nguyen Thanh Long-i, scientist temi shiranger kar dak iba virus bushisüngdangba mapang nung variant tasenba ya puteta liasü, ta metetdaksü.

Tawa Vietnam linük nung coronavirus tashidak tali prokba ya variant tasenba ya ajanga asütsüba akok, ta Long-i metetdaksü.

Taküm May ita tetenzüklen Vietnam-i coronavirus wara madak takok nguogo ta bilema liasü, saka tang asentenshir iba tashidak tanaben proker.

Iba wara tenzüka mapang nungi Vietnam nung nisung ajak agi 3,100 dak iba tashidak putet aser iba tashidak agi nisung 35 dang asü, ajisiüka tesüiba hopta ishika tsüngda ano nisung 3,500 tema dak iba tashidak putetogo aser nisung 12 süogo.

ANOGO ABEN TSÜNGREM DEN

Temeshiba Metsü Prokba

Saka temeshiba prokeri chichiba sempet angur.

A. Shin 11:18b

Asenok taküm kumzüka alitsü lemanng aika lir saka temeshiba asoshi asenok sasa bendanga agütsüba nung sempet tulu agütsüba danga lemanng kecha nunga mali. Asenok jenjang ajak Tsüngrem temeshiba sayutsüla aji tekümtet ajanga asenok meyong lir: asenok tebilemba temeshiba asoshi bilemba asütsüla, idangji asenoki kechi bilemer aji Tsüngrem chir asoshi mapet masütsü; asenok mapa, idangji asen takümi temeshiba Tsüngrem ka tenzüker ta kuli asütsü; asenok tsüngchiba, idangji asenok tesendaktep ajak nung shingai mashishitsü.

Ne taküm nung nai Tsüngrem temeshiba sayur asü? Temeshibaji nai ne taküm nung mapa inyaktsü melaba lir. Temeshiba bilemba metsü proktsü melen, nai tebilemba nung tamajungba aser temenen tebilemba indaktsür asü? Nai shi jangraba menokdangi mesüra tatok magütsütetba ne taküm nung lidaktsür asü? Yisui ashi asenok Tsüngrem aser Pa temeshiba tema bushira Pai bendenloktsütsü (Matt. 6:33).

Temeshiba metsü prokba nung sempet tulu lir. Tang nai ne taküm nung metsü proktsü sentong lir? (1 Peter 1:15). Ne tebilemba temeshi asütsü asoshi nai ne kolok nung temeshiba koda ayur? Na tsüngchir süa alitsü asoshi ne tesendaktep nung temeshiba koda arur? Asüng nai ne taküm nung temeshiba aluruba kanüra, tanü nai temeshiba metsü azüngtsüla.

Bendanglen alir Iraq nunger Khristantemi vote magütsütettsü

May 30, 2021: Iraq nung telemtetbaji pusemer. taruba general election nung Iraq War refugees shilem 40 bendanglen alir Iraq nunger bo Assyria nunger Khristantem Khristantem nem vote lir. 2003 kum nungbo Iraq nung magütsüdaktsütsü atema Assyria nunger nütsüng million telemtetba agiogo. 1.5 liasü saka tangbo Assyria

Taküm October ita nung nung 142,000 dang lir. parliamentary elections agitsü Tang IHEC telemtetba atema candidate tem renemdar. ajanga bendanglen alir Assyria Parliamentary menden 325 nunger Khristan aikati Iraq atema candidate 3,500 dak general election nung vote temai tenüng agütsüogo aser magütsütettsü.

Parnok rongnung Khristan candidate 34 dang lir. Tang Iraq nung alir Assyria nungertemi parnok yimsüsürtem shimtsü aser Assyria nunger candidates shimtsü atema bendanglen alirtem votes nungdaker.

Nineveh nung lir. Parliament nung Tawa Iraq nung Independent Khristantem nem menden 5 High Electoral Commission dang shiteta (reserved) yutsür, (IHEC)-i telemtetba agiba aser nütsüng apibo mendenji ajanga bendanglen allir Iraq kanga ajemer.

Parliament nung Iraq nung Khristan nütsüng kanga ajema kumogo, iba denji shilem magitettsü.

Linük nung malir sensotemi kumlemi tang IHEC telemtetba Iraq nung alirtem atema ajanga bendanglen alir telemtetba agitsütsü makok, ta Khristantemi iba election nung shia nisung aikati IHEC vote magütsütettsü.

OLONG PAITEP # 5829

1		2			3		4		5
				6		7			
8									
						9			
			10						
11									12
					13			14	
15									
16							17		

TIPILEN		LANGTSÜNGLEN	
1. Nüji masü - (4)		1. Jila tulu - (5)	
3. Techinütsüka - (6)		2. Sarasademdang tembang - (4)	
7. Aketa shirangba - (5)		4. Tarutsü indang ashirtem - (6)	
8. Pi - (6)		5. Alia - (5)	
9. Amena - (5)		6. Mojing - (5)	
10. Kinü - (5)		9. Tai inyakba metet - (5)	
11. Tanang masü - (5)		10. Medemer hijiba - (6)	
13. Lenmang - (6)		11. Tatokba / Amadok - (5)	
15. Nubo tedi - (5)		12. Anüngdang masü - (5)	
16. Tuoshi - (6)		14. Jabaso masü - (4)	
17. Shiruru apuba temenatsü - (4)			

OLONG PAITEP # 5828 TELANGZÜBA

TIPILEN :	LANGTSÜNGLEN :
1. Tesangra, 5. Mungo, 7. Kisen,	1. Temesen, 2. Raksa, 3. Aon, 4. Aso,
8. Salem, 12. Semki, 14. Kilem,	6. Nile, 9. Alizüng, 10. Omen,
15. Kensü, 16. Sangpang.	11. Lemta, 13. Ola, 14. Kin.



OTSÜLA PELADANG AIÜRLA TEMAOTSÜ SÜANGMA

Aiürla : Hai otsü, na yamai belemseta bank nung kechi nüngdak atema aru aka? Aser tular dang kechi koma ka asüngdangnüa nokdaker ya?

Otsüla : Hai aiür, kü taküm nung Bank telungi aruba ya tanü mezüngbuba asütsü, aser tanü ya ozü kinungbo nüngdak kar nung oa lir, anungji ni pa indang sen tera tangutsü aliba agizüksü ta ser nenok bank telungi ait nung shiba dang masüngdangtet oda otsüla tepang nungbo manga ajak iaa bangaseta nokdakerba ati. Oda tanü otsüla tia junga na ajurua nai otsüla yaritsü mulungtetba ya otsüla kodanga mamatsüa nu.

Aiürla : Auhja tanü asüng ya lanu putu nung alir asünung nai iba ama bank aser tanga office nung onok lanurtem dang ajurutsü aser onok tangatetba ajak agi nenok ama tantsür tamburtem yaritsüji dang tangatetba tulu lir adi.

Otsüla : Ayama, tanü otsüla bank nung mapa ajak temja yariba atema kanga dang pelaseter, talisa asen nisung nenok lanurtemi ni ama ka pei tetsü tasola dang nungi taoba mapa ajak tongzüka yariba ya koda tepelatsü, anungji otsüla pelaba temaotsü ya teyagluri na tali yaria moajangma.

Lilir : S. Repa Pongener, Mon Bosti (Assam)

TANÜBO NAI LANGZÜANG

Q. Koba küm China indang '17+1' cooperation tenzük?
 A. 2021 B. 2012 C. 2015 D. 2016

===== (Taruba adok nung onoki langzüsü)
YASHI ADOK TELANGZÜBA : Empire Day

AO OSHI ANGAZÜKDAK:

TANÜ ANGAZÜKTSÜBA OJANG

Jeblok

(v) ak talila bener arua metsüba (added one or more swine in the farm)

* Ozüi moatsü dang achitsü ak talila ka **jeblok**.

Jeblok

(v) tabubang nung sü abenlokba (Wear shawl over shoulder)

* Yimsüsüri pa tabubang nung tsüngkotepsü **jeblok**.



Tir Yimiyim

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

ALIMA NUNG TONGTIBANG SPACE RESEARCH ORGANIZATION KAR:

1. National Aeronautics and Space Administration (NASA)	Formed: 1958
2. China National Space Administration (CNSA)	Formed: 1993
3. European Space Agency (ESA)	Formed: 1975
4. Russian Federal Space Agency (Roscosmos)	Formed: 1992
5. Indian Space Research Organisation (ISRO)	Formed: 1969
6. SpaceX	Formed: 2002
7. Japan Aerospace Exploration Agency (JAXA)	Formed: 1993
8. German Aerospace Center (DLR)	Formed: 1969
9. Italian Space Agency (ASI)	Formed: 1988
10. National Centre for Space Studies (France)	Formed: 1961
11. Canadian Space Agency	Formed: 1989

SUDOKU # 5871

TELANGZUBA # 5870

8	1			5	4			4	7	6	5	2	8	1	9	3	
		7	9				6	2	8	1	7	9	3	4	5	6	
2	6		7	8			9	1	9	3	5	1	4	6	8	2	7
	4		3			6	2	7	9	8	6	5	2	3	1	4	
9		6				1	5	1	5	4	8	3	9	6	7	2	
3	2		6	7	1		8	6	2	3	4	1	7	5	8	9	
		2			8	7	5	8	4	2	9	6	5	7	3	1	
7		3	4	2		1	8	5	6	9	3	7	1	2	4	8	
4			5			2		3	1	7	2	8	4	9	6	5	

OJANG LUTEP # 5415

KATAR :

END :

NGDA :

SÜMA :

KASA :

ARTIL :

NADE :

MBTEAR :

YAUTSNGLÜ :

ANGMERANG :

OJANG LUTEP TELANGZÜBA # 5414

TEINYAKTSÜ MAPA JENTI LIAKA SHIA METETER
 MALIBA AJANGA WADANG MEKOKTET

TAN HOPTA ATEMA - KOMA SÜLA ?

Q. Asenok Aotsür Aor kidang tangar nisung kilir mayu nunga koma süla ?

Modi sorkari kum 7 tsungda mapa aika inyaktetogo: Amit Shah



New Delhi, May 30, 2021: Centre nung Ato kilonser, Narendra Modi-i aniba BJP sorkar kum 7 ajungba nungtem nung Amongnu New Delhi nung BJP National Tir, J.P. Nadda aser BJP MP, Parvesh Verma nati COVID relief materials lemstuba sentong tenzüksuba noksa nung angur.

New Delhi, Munipii/May 30 (Agencies): Centre nung Ato kilonser, Narendra Modi-i aniba BJP sorkar kum tenet ajungba anogomong nung Amongnu Union home minister, Amit Shah-i Ato kilonser den salem osang lemsatopogo.

Amit Shah-i, Modi sorkar kum tenet mapang nung sorkari security, public welfare aser reforms tsütsü mapa aika inyaktetogo, ta metetdaksü.

Shah-i Hindi oshi nung twitter ajanga, linük nung sensakertem, aluyimertem aser tekubok jenjang nung alirtem taküm libaliro ajungkettsüba atema Modi nem tenüngsang agütsü.

"Modi sorkari terenlok, security, nübur tenzükba aser ozüng tasen aika benokba tsütsü amalitepa inyakba ajanga tatishitsü balaka sayuogo," ta Shah-i metetdaksü.

Tesüiba kum tenet tashi linük nüburtem Modi dak tamang katetogo aser iba atemaji pai linük nüburtem dang pelar, ta pai metetdaksü.

"Mangdang aliba lenir, Modi lenisüba kubok asenoki tayongzükba ajak koktettsü aser maneni tetsükdaksü kecha makai India terenlok lenmang nung anitsü ta ni melung lemteter," ta Home Minister-isa metetdaksü.

Congress-i Modi sorkari kum 7 tsungda aibelenba onük 7 saya

New Delhi, May 30 (Agencies): Ato kilonser, Narendra Modi-i aniba Centre sorkar kum tenet ajungba anogomong nung Congress-i sorkari aibelenba onük tenet sayaogo.

BJP-i lenla ajak nung tamakok nguogo aser nüburtem tamang raksatsüogo, ta Congress-i aitsü.

Congress-isa, coronavirus wara mapang nung Modi-i aniba sorkari nüburtem atema teinyaktsü khuret meinyaktet, ta aitsü.

Modi-i ita shia radio ajanga nüburtem den jembiba sentong 'Mann Ki Baat' aija Congress lenir aser Wayanad MP, Rahul Gandhi-i, ita shia radio ajanga jembiba dang masü saka Centre sorkari wara anema raratsü atema mapatong renemtsüla aser nükjidong yur inyaktsüla, ta ashi.

radio sentong ajanga jembiba anogo nung Rahul-i Hindi oshi nung twitter ajanga, "Ita shia tagitsü maliba o jembibaji dang masü saka corona anema raratsü atema mapatong renema nükjidong yur inyaktsü nüngdak," ta metetdaksü.

Congress-isa Modi sorkari kum tenet tsungda aibelenba tongti onük metetdaksü, item rongnung linük rongsenkettsüng jenjang tamajungba akümba, mapa manguba tebilemstü tuluba akümba aser osettsüset nung jenjang atuba densema lir.

Congress general secretary aser otongdar, Randeep Surjewala-i, tesüiba kum tenet tsungda tesaksatsüba tulu atalokogo, teinyaktsü khuret meinyaktet aser sorkar kati linük nüburtem sendok, ta metetdaksü.

"Linük atema iba sorkar ya lendong keta lir, kechiyong sorkari India nüburtem tamang

raksatsüogo. Nüburtemi Ato kilonser Narendra Modi dak tamang katet, ajisüaka sorkari nüburtem tamang raksatsüogo aser nüburtemi imlaba ashioktsüogo," ta pai ashi.

"Parnoki aika nangzükba nung ajemdaker India nung crore 140-i parnok shim saka sorkari nüburtem mejungi ashioktsü. Linük nüburtem kechiba timtemer, ta asüngdangtsü mapang tongogo," ta Congress lenirisa ashi.

Congress-isa minute 4.5 video "Bharat Mata ki Kahani" adoka tesüiba kum tenet tsungda Modi sorkari tamakok angubatem metetdaksü.

Ano külen Congress aija BJP National Tir, JP Nadda-i, coronavirus tanaben prokba mapang nung Opposition quarantine nung mongdar, saka BJP bo wara agi kongshirtem atema relief agütsüba mapa inyaker, ta metetdaksü.



May 30, 2021 nü Jaipur nung Police-i nüburtem coronavirus nungi jenbua alitsü atema awareness agüja rally ka nung shilem agiba noksa nung angur.

Tanü nungi India tzüyimkümlen tzüngluruwa mongpu tenzüksü: IMD

New Delhi, Monupii/May 30 (Agencies): Hombar, May 31, 2021 nungi tenzük India south tsütsü tzüyimkümlen linük nung tzüngluruwa mongpu tenzüksü, ta Amongnu India meteorological department (IMD)-i metetdaksü.

May 31 nungi Kerala state tzüyimkümlen tzüngluruwa mongpu tenzüksü, ta IMD-i metetdaksü.

Linük nung aluyimba li

shilem 50 jungnüa nungbo alu nung tzü mesioka mali, anungji alu nung aonsotsü balala züsentettsü atema aluyimertemi tzüngluruwa mongpu (June nungi September) mapang tzünglu aruba nung ang metaloker.

Taoba ita IMD-i, taküm linük nung tzünglu junga arutsü aser ibaji ajanga linük nung alu nungi aonsotsü jenti züsentettsü, ta metetdakja liasü.


WHO-i India nunger dang vaccine agitsü ajungshir

New Delhi, May 30 (Agencies): Amongnu World Health Organisation (WHO) Regional Director for South East Asia, Dr Poonam Khetrapal Singh-i India nunger dang maongka anguba mapang tekaraba nung coronavirus vaccine agitsü ajungshi.

Tang India nung anogo shia coronavirus case tajemba putetba mapang nung Singh-i, "Tang wara tanaben prokba ajanga asenok melung sür zübazülema malitsüla ta asenoki tangazükba nguogo.

Asenoki maongka anguba mapang tekaraba nung #Covid19 vaccine agitsüla. Ano kodang maneni iba wara proktsüar asenoki memetet, saka asenoki nokdangtettsü akok," ta metetdaksü.

"Wara tanaben prokba ajanga health services nem khuret tulu agütsü. Tang wara prokba ajemdar aser India tesem kar nungbo kanga ajemdar. Ajisüaka tang tashi tensa majung aser tayongzükba lir," ta lai metetdaksü.



Puri (Odisha), May 30, 2021: Cyclone Yaas ajanga angopurtem anogo aika tzüyimi angopui moutetba sülen Amongnu Odisha kubok Puri nung angourtem tzüyimi angopui aotsü atema renemba noksa nung angur.

India nung ano nisung lakh 1.65 dak Covid putet aser 3,460 asü

New Delhi, May 30 (Agencies): Tesüiba ghonda 24 tsungda India nung ano nisung lakh 1.65 dak coronavirus putet aser ibaji tesüiba anogo 46 tsungda anogo ka kija nung ishitiba putetba lir; tang tashi nung linük nung coronavirus caseload crore 2.78 jungogo aser iba tashidak agi asür lakh 3.25 jungogo, ta Amongnu Union Health Ministry-i metetdaksü.

Tesüiba ghonda 24 tsungda linük nung nisung 1,65,553 dak coronavirus putetba sülen coronavirus caseload ajak agibo 2,78,94,800 jungogo, ta Amongnu anepdang 9:00 ako nung Union health ministry data ajanga metetdaksü.

Anogo shia coronavirus positive putetba shilem 8.02 dang kümogo aser hopta nung positive rate shilem 9.36 dang kümogo.

Tesüiba ghonda 24 nungsa linük nung coronavirus tashidak agi nisung 3,460 asü aser tang tashi nung ajak senteperbo iba tashidak agi asür 3,25,972 jungogo.

Tang India nung anogo shia iba tashidak putetba tajemba akümer, ajisüaka asürtembo kangabo majemer.

Honibarnü linük nung samples 20,63,839 tendangogo aser tang tashi nung samples ajak agi 34,31,83,748 tendangogo, ta Health ministry-i metetdaksü.

Tang linük nung coronavirus agi teshirangdakpur 21,14,508 dang lir aser ibaji coronavirus caseload nungi shilem 7.58 lir. Linük nung iba tashidak agi shiranger shilem 91.25 (nisung 2,54,54,320) anepogo aser iba tashidak agi shiranger asüba shilem 1.17 kümogo, ta Health Ministry-isa metetdaksü.

Pua aliba Nigeria kaketshir 14 chiokogo

Abuja, Monupii/May 30 (Agencies): Northern Nigeria nung aliba university ka nungi taoba ita pua bener aoba kaketshir tanüంగా nisung 14 chiokogo, ta ketdangsürtemi ashi.

Ita ishika tsüంగా northwest Nigeria nung telungpur telok balalai school aser university nung lendong agüja arur, aser December ita nungi tenzüka tang tashinung kaketshir 700 dak tema pua bener oa parnok alangzüksü atema sen meshia arur. Security forces temi nisung pua bener aoba telok anema kecha meinyaktetba ajanga nüburtemi longkak aiter.

Linük northwest tsütsü Kaduna state nung aliba Greenfield University telungi April 20 nü prangbong bena alir nisung telok ka aita liasü. Iba mapang parnoki nisung ka tepset aser iba lendong atalokba sülen anogo ishika lir parnoki pua bener aor nisung pongu tepseta liasü.

"University nungi pua bener aor kaketshir ter-ser pezü chiokogo," ta Greenfield University nung pro-chancellor, Simeon Nwakacha-i osangbener dang phone ajanga Honibarnü ashi. Pua bener aortem rongnung par 14 ya anüంగా liasü, ta pai ashi.

Kaduna state indang security commissioner, Samuel Aruwan-i sangdong ka nung

ashiba agi, university nungi pua bener aoba nisung 14 chiokogo aser parnok ya Honibar nikongdang 2:00 ako (par mapang) meta Kaduna aser linük yimtiba, Abuja na sendaktepba lenmang tezülen nguset.

Pua alirtem ya parnok alangtsü atema sen agütsüba sülen chiokba asü masüar ano mejangja.

Nigeria tesem aisülen senotsü meshitsü mechi nisung pua bener aoba ya kanga bulua akumer, kong alangzüksü atema sen bushirtemi shishilempar, ketdangsür aser nüburtem yimtung nung lia pua bener aor.

Iba ama mapa tamajung inyakba teloktem tangatetba aser nükjidong balaka mali saka sen mechi inyaker. Saka parnok ya sorkar anemba telok temi ajungmesor alitsü südi, ta tamang makateti lir.

2016 küm January ita nungi 2020 küm March ita tashinung nisung pua bener aor nem sen million \$11 shi agütsüogo, ta Lagos nung amenoka aliba geopolitical research consultancy, SB Morgen ajanga ashi.

Iba ama mapa tamajung inyaker nem senotsü aser gari agütsüba sentong tanaben reprangshitsü atema Tir Muhammadu Buhari-i state sorkar tem dang February ita ajungshia liasü.



Israel nungeri Palestine nunger tanurtem tepsetba noksa amer Washington nung aliba Lincoln Memorial nung Palestine nunger busema National March jajadang tangokba noksa ka yangi angur.

Nepal opposition-i PM Oli inyakyim pumasemtsü mepishi

Katmandu, Monupii/May 30 (Agencies): Nepal nung Opposition alliance-i Deobarnü state institutions ajak dang Ato Kilonser KP Sharma Oli-i aniba sorkar indang "unconstitutional" aser "anti-democratic" inyakyim pumasemtsü mepeshia metetdaksüogo. Parnokisa, Parliament lower house loksatsüba atema ken o benoka aliba ya Supreme Court-i parnok medena obendang agütsütsü imlar, ta ashiba media sangdong ka ajanga metetdaksü. Nepal Supreme Court

Constitutional Bench kati Hokolbarnü, Parliament lower house loksatsüba anema writ petitions 30 benoka aliba angadangogo aser Deobarnü maneni item ken o tem angdangtsü latettsüogo. Ajisüaka osang agütsüba mapang tashi nung SC-i obendang agütsüba osang kecha mangazüki liasü.

Tir Bidya Devi Bhandari-i May 22 nü ita pongu tsüంగా züంగాsem 275 agi kümtetba House of Representatives ya anaben tashi loksatsü, aser Ato Kilonser tetuyuba nung November 12 aser 19 nü election agitsü atema sangdonga liasü.

Kasa mapang nung Ato Kilonser Oli aser Opposition alliance-i sorkar kümtettsü atema benokba lai magizük. Oli aser Nepali Congress tir Sher Bahadur Deuba nati Ato Kilonser mapa abentsü atema benok, saka parnok pusemertem tepri masü ta shia Tir-i tenaprongla magizük.

Nepali Congress (NC), CPN (Maoist Centre), Madhav Kumar Nepal-i aniba UML party, Upendra Yadav-i aniba Janata Samajbadi Party (JSP) aser Rastriya Janamorcha Party nunger Deobarnü senden ka menogo, ta myrepublica.com sangdong ka ajanga metetdaksü.

Iba senden ya Kathmandu kübok Budhanilkantha nung aliba Deuba'er kidang mena liasü.

"Ozüంగా yanglur 149 teyari nung onoki Ato Kilonser mapa atema benok. Sorkari iba ken o dak ajemdaker house loksatsü atema telemtetba magitetsü," ta Opposition alliance-i külem sangdong ka ajanga metetdaksü. Tang Nepal nung sorkar kümtettsü atema vote 136 nüngdak lir.

Opposition alliance-isa, state nung tenüktelen aser institutions ajak dang sorkar indang "unconstitutional" aser "anti-democratic" inyakyim pumasemtsü atema mepeshia metetdaksüogo. "Supreme

court-i onok medena obendang agütsütsü imlar," ta kasa sangdong ajanga metetdaksü.

Nepal nung Opposition alliance-i May 24 nü, House of Representatives tanaben amenoktsü aser Deuba Ato Kilonser kümdaktsütsü khanga Supreme Court nung writ petition ka benokogo. Tangaria House of Representatives loksatsüba atema SC nung temepishibatem benokogo.

Oli-i Hokolbarnü political party tem dang party ajak longjemer sorkar ka kümtettsü aser election agishitsü atema mepeshiogo. Paisa, tir-i House of Representatives anaben tashi loksatsüba medena jembitsü merang aser ashiba agi, linük tamendak-dak anokshiba ya Parliament inyaksangshi mesütetba ajang lir.

Taoba küm December 20 nü tir-i Parliament loksatsü aser April 30 aser May 10 nü election agitsü atema ayongzük. Ajisüaka ita ana sülen Rana-i aniba Constitutional Bench kati February 23 nü iba telemtetba magi kümdaktsü aser House tanaben amenoktsü atema tetuyuba agüja liasü.

Temzüంగా ozüంగా dak sendakba nung mongintemi, temzüంగా ozüంగా pei mulungka nung amshitsü merangba atema Oli aser Bhandari na aitsüogo.

Nepal nung sorkar kümteter aliba party Communist Party (NCP) yongtsü nung mangatetep adoker aliba tialong nung taoba küm December 20 nü Ato Kilonser tetuyuba nung tir Bhandari-i Parliament lower house loksatsü aser April 30 aser May 10 nü election agitsü atema sangdonga liasü.

Tir-i house loksatsüba sülen Nepal nung yimden yimsütsüba tsütsü mepetmesü tulu adok aser iba mepetmesü ya tang tashi mebenettei arudar.

Oli-i, House loksatsütsü atema telemtetba agiba sülen NCP yongtsü nung Pushpa Kamal Dahal 'Prachanda'-i aniba teloki Oli anema nokdak tenzüంగా.

Israel nung Benjamin Netanyahu yimli laotsü akok

Jerusalem, Monupii/May 30 (Agencies): Ato Kilonser Benjamin Netanyahu-i otsü yanglua Israel nung yimsü asüba tatem kati arutsüsa Deobarnü yimdenren tsütsü makmakshimak adoka lir.

Küm ana nung parliamentary election pezüben agiba sülen opposition lenir Yair Lapid nem sorkar tasen ka tentettsü atema anogo 28 züంగాzüksüba Bodhbarnü tembangtsü aser Netanyahu-i küm 12 ato kilonser inyakba tatem kati arutsüsa Lapid-i teloktep sorkar ka

tentettsü jenjang ka nung lir, ta osangtem ajanga ashir.

Lapid-i takok angutsü atema far-right nungi yimden yimsütsü Naftali Bennett dak tuluka keta lir aser par Yamina party ya parliament nung menden tongtipang trok lir.

Arishi küm 49 tain Bennett yagi Lapid den lungjemtsü asü masüar, Deobarnü osang sangdongtsü imlar. Lapid ya Yesh Atid party nung tekolakba lir.

Saka mezüంగాbuba nung Bennett yagi par party indang legislator tem anir arua

Netanyahu den tokteper temi 'temelenshi sorkar' ta nüంగా agüja aliba nungya adentsüla, kong left, centre aser right nungi telok balala lir.

March 23 nü parliamentary election agiba nung telok kati sorkar tentettsüsa menden mongutetba sülen iba ama telok aika lungjemba ya tashi mait asütsü, aser yangji tezülen nungi Arab members of parliament (Palestinian citizens of Israel) teyari nüngdaktsü, shirnok Yamina den tangatetba balala lir.

(Maneni tapak 10 nung...)



Congo anüdoklen Goma kübok Kituku rongnendak nüburtem Lake Kivu ajanga South Kivu province leni jena aodang tangokba noksa ka yangi angur. Mount Nyiragongo nung volcano ano maneni pokteta adoktsü südi ta tetsübu nung nisung meyerijang aika Goma yimti yutsür jena aor, koba taoba hopta iba tenem nungi moloshi tatsük jazüka alua liasü.

Grammy takok angusang B.J Thomas süogo

Monupii/May 30, 2021

(Agencies): America nunger nungtugu kentener B.J. Thomas alima nungi pilaogo. Pa arishi kum 78 liasü.

Tepokpok cancer agi shiranga Ariba sülen, Honibarnü (29.05.21) award takok angusang Thomas ya pa alidak Arlington, Texas nung asü.

Thomas asüba osang ya pa indang official Twitter page ajanga sangoktsü.

"Tejashi tulu nung onoki BJ Thomas asüba osang jangjatsür," ta Twitter nung lemsatep.

Thomas, shiba 'stage-four lung cancer' tashidak agi kangshia liasü, pai 1960s mapang music wadang nung ajemok aser pai atenba nungtugu ken rongnung 'Raindrops Keep Fallin' on My Head' liasü.

1969 kum, 'Butch Cassidy and the Sundance Kid' atema 'Best Original Song' telesa nung Thomas-i Oscar takok angu.

Thomas, shiba 'Hooked on a Feeling' aser '(Hey Won't You Play) Another Somebody Done Somebody Wrong Song' ken ajanga chart nung temaba jenjang ajangzuktet, takum March ita pa dak 'stage -four lung cancer' tashidak aliba osang jangjatsü aser Texas nung anepalua liasü.

Iba tashidak anema raraba mapang, Thomas-i, "Ni iba maongka tajung agia, kum 53 dak tema tesendaktep tajung nung meimtepa aruba kü temeim kinungtsü Gloria, kü kinungertem, medemertem aser fans dang pelaba lemsateper," ta ashi.

"Pop, country aser gospel sabang nung ken tajung mejema aser record asütsü maongka anguba den külemi item music alima ajungalen nübur million sa million den lemsateptsü mapang tajung sempettsüba ya temoatsü ka ama ni agizüker. Tang ama mapang, nenok sarasadem aginür aser kü music ajanga nenok takum nung teti jembitsü imlar," ta Thomas masüdag pai iba olen

lemsatepa liasü.

Pop star, Thomas indang nungtugu ken rongnung classic 'Raindrops Keep Fallin' On My Head' alitsü, koba 'Butch Cassidy and the Sundance Kid' nung amshigo aser Best Original Song atema pai Oscar nguogo. 1970 kumkasa ken atema Best Male Pop Vocal Performance category' nung Thomas-i Grammy award angu.

2014 kum, 'Raindrops Keep Fallin' ajanga Thomas-i 'The Grammy Hall of Fame Award' takok nguogo.

Pungoben tashi Grammy takok angusang, Thomas-i alima ajunga nung kensep million 70 dak tema yokogo, kong country, pop aser Christian chart nung mapang balala pa ken ajanga temaba jenjang tongteta liasü.

OFFICE OF THE CHUNGTIAYIMSEN VILLAGE COUNCIL P.O.Mangkolemba; BPO : Chungtiayimsen Dist : Mokokchung, Nagaland. TEPELA SANGDONG

Shri. Temjen Imna Along Longkümer, Hon'ble Minister, Higher Education & Tribal Affairs, Govt. of Nagaland, pai Chungtiayimsen nunger nem tan Covid-19 wara atema mozü aika agütsüba asoshi Chungtiayimsen Council-i pa dang kanga pelaba sangdonger. Tarutsü nung pa mapa tajung asoshi Tsüngremi ano tali moajangma.

Sd/-
N. SEMMAK PONGEN
Chairman,
Chungtia Village Council.

Office of the Dimapur Aonokpu Senso Telongjem Dimapur - 797112 : Nagaland Mangyim O Lemsateper

Ozü lenir Tebu Tedi Late. K. Imliyanger Jamir alima nungi pila aoba kanga sasar. Asen Dimapur Aonokpu Senso Telongjem atema shisa tajung agütsür aser teyari angudak tajung ka samaogo. Nübo, shisatsü aser rongsen agi teti yarir ka asüdag sensena bilemer.

Alima tensa mapang agi yamai bener arutsü nung ozü lenir asüku nung tsüngtong arua shilem magiba sasa-a nemjemer. Tonga marutetaka Dimapur sensosanger ajaki sarasadem nung yariogo aser maneni yaridar.

Dimapur Aonokpu Senso Telongjemi asüri doktsüba kinungtsü, chirmurtem aser kinungertem den teti dena lir.

Ozü lenir Late . Er. L. Imyulangba Longchar alima nungi pila aoba kanga sasar. Asen Dimapur Aonokpu Senso Telongjem atema tongshi ka laoadokogo. Nübo tajung, shisa taka aser rongsen talubu agi yariba takum ka samadang kanga sasa-a bilemer.

Alima tensa mapang agi yamai bener arutsü nung ozü lenir asüku nung tsüngtong arua shilem magitetba kanga sasa nemjema bilemer. Tonga marutetaka Dimapur sensosanser ajaki sarasadem nung yariogo aser maneni yaridar ta shisemer.

Dimapur Aonokpu Senso Telongjemi asüri doktsüba chirmur aser kinungertem den teti dena lir.

Sd/-
C. Bendang Longchar
President, DAST

Sd/-
Imtichang
Secretary, DAST

Pelaba Lemsateper

Tesüiba kum nungi PHC Longkhum nung maneni rongsen aser amalitepa nungita yaria aruba atema Longkhum Village Council dang Health Centre Management Committee (HCMC) Longkhum & PHC Longkhum-i temolung taroktiba nungi pelaba lemsateper. Nenoki temolung toka aser molungsoa yariba ajanga PHC Longkhum renloka odar. Tawa, PHC indang ambulance yanglushitsü asoshi senotsü teyari 50,000/- agütsüba ya tang ama tensa tamajungdang Tsüngremi teyari yokba ka ama lir. Tajungsang Tsüngremi Village Council Longkhum metitemi moatsütsü aser tarutsü nunga nenok wadang ajak nung azükaru temoatsü lidakjangni ta onoki sarasademtsür.

~ PHC Longkhum Staff



Mokokchung Covid-19 Hospital nung kanga dang nungdakba reprangteta Nagaland Rural Development Minister, Metsübo Jamir aser par kibongi Kirloskar Generator 20 KV ka tenla agütsüba mapang, Mokokchung D.C - Limawabang Jamiri anir S.P - Vishal IPS, CMO - Dr. Chubala, IMDH M.S - Dr. Limatula aser Minister Metsübo indang PS kar densema angur. Tang mapang electricity ya kanga tongtibang lir, saka khenkhen light junga marudang tetsükdaktsü ajurur, iba timtemji ngua asen lenir Metsübo Jamir-i Covid hospital nung amshitsü atema generator tenla agütsüba asoshi District Task Force (DTF) mendenbuba aser Mokokchung DC, Limawabang-i iba osangbener den jembidang metetdaksü. Mokokchung, May 30, 2021.

Mulungnen O



ASO :
01.07.1974

ASÜ :
24.05.2021

Onoki tedi meima aliba temeim ojala Lt. Mrs. Bendangmongla Merangkong (Tuli). La shirangba mapang nungi la akümüli toktsür aoba anogo tashi Doctor aser Nurses, Yimer yimsanger, kinunger aser kiyonger aser lokti shrinoki nübu , rongsen aser sarasadem agi ozü kibong den yaritepogo, nenok ajak dang pelaba lemsateper.

Tsüngremi nenok mapa tajung moajangma.

Temeim Kinungbo, Jala , Jabaso aser Kinungertem.

Mulungnen O



ASO :
15/02/1939

ASÜ :
22/05/2021

Meimlaba mapang ka nung onoki teti meima aliba asür Wt. Sangyutula Jamir (Longmisa), mapang tatsüka shiranger la alima nungi piladang kinungertem shisabulu aser mangyim jashi nung alidang kija, kibong, Arogo, yimden aser lokti shirnokisa sarasadem, nübu, shisatsü aser rongsen agi nungita yariogo, nenok ajak dang kanga pelaba lemsateper. Asen Teyanglur Tsüngremi nenok mapa tajung meyiba moatsütsü onok sarasadem.

Temeim Jala, Anukapang, semchir aser kinungertem.

OFFICE OF THE UNGER SENSO BENDANG ALI TELONGJEM TENÜNGSANG AGÜTSÜR

Wb. C. Lima Imsong-i Joint Commissioner of State Taxes menden tongtetba atema, Unger Senso Bendang Ali Telongjem-i nümatanga pa nem tenüngsang agütsür.

Pai iba maparen tasen agizüka wadang awawa inyaka aoba mapang, Tulusang Tsüngremi pa nem anema aliba, shisatsü aser arishi talang maneni moajangma ta Senso-i sarasademtsür.

Sd/-
N. Lima Imsong
President, USBAT

Sd/-
Walu Jamir
General Secretary, USBAT



Asükhü Lemsateper

Asür I. Toshi Jamir G.B ajungbena alima nungi pila aoba angashia MDGBA kanga dang aoksar aser sasa bilemer. Asür I. Toshi Jamir G.B ya association nung A.G.S (Repsem Zülur) teinyakdak liasü. Pa ya mapa nung kanga tenendak nübu ka liasü, pa ama nübu tajung anojungi alima nungi pila aoba ya MDGBA asoshi tapok tulu ka apar. Kanga dang sasasetta MDGBA pur ajaki asüri toktsüba kinungtsü, chirmur aser kinunger ajak den asükhü lemsateper.

Sd/-
Along Jamir (G.B)
President,

Sd/-
Temsu Jamir (G.B)
Secretary, MDGBA

Asükhü Lemsateper

Langpangkong G.B Union pur ajak Mr. I. Toshi Jamir G.B ajungben alima nungi pila aoba osang angashia kanga aoksar aser sasa bilemer. Asür I. Toshi Jamir G.B ya Langpangkong G.B union nung kum aika mapa balala nung tanishir inyakba nübu ka liasü, pa ama Wabong tajung ka alima nungi pilabaji ozü Union asoshi taoksa tulu lir.

Langpangkong GB union ajaki asüri toktsüba kinungtsü anir chirmur aser kinunger den asükhü lemsateper.

Sd/-
Senti (G.B)
President, LGBU

Sd/-
Odi (G.B)
Secretary, LGBU

Chelsea-i Champions League tanabenbuba kokogo



Monupii/May 30, 2021 (Agencies): Estadio Do Dragao nung Honibar aonung Chelsea-i Champions League final nung goal 1-0 agi Manchester City madak takok ngua iba asayamung tanabenbuba kokogo. Pep Guardiola-i aniba Manchester City team-i iba asayamung khen danga koka mali aser tang mezüngbuba iba asayamung akoktsü timla nung asaya

ajisüaka, Kai Havertz-i goal ka idaktsüba ajanga parnok nungi iba maongka agin.

Asaya tenzüker minute 42 buba nung Kai Havertz-i goalkeeper Ederson kanga junga paitoker goal tazüng ka nung ball longokja liasü. CL final asayatsü atema terpranger 16,500 nem temelaba agüja reprangdaksüogo.

Premier League champions City puri iba asayamung

akoktsü imlaa liasü, ajisüaka parnok goal idaktsütsü atema maongka monguteti asaya tembang.

Taoba Premier League titles pezü nungi asem koker liaka City coach Guardiola-i tang tashi Europe nung asayamung tulutiba ya khen danga mekokteti lir. Pai tatemsa iba asayamung 2011 küm Barcelona coach mapa bener aliba mapang kokogo.

Kasa mapang nung Chelsea manager Thomas Tuchel, taoba küm Paris St Germain coach mapa bener aliba mapang pai aniba team final nung Bayern Munich-i tsükdaktsü, ajisüaka Frank Lampard melenzüker ita pezü dang lir pai iba asayamung kokogo.

"Iba takok ajak den lemsateptsü ya jangrademtsüka. Onoki koktetogo. Ni kechi bilemjar memetet. Final tanabuba asayatsü maongka anguba atema ni kanga pelaa liasü. "Iba asaya akoktsü atema asayatem mulungteter liasü. Onoki City pur nem timtem agütsünüa liasü. Onoki ajak dang tejak dangi arurtsü aser tasü aittsü ajungshia liasü," ta Tuchel-i ashi.

Asaya nung telok anapronglai goal idaktsütsü atema maongka yangluteta asaya ajisüaka goal midaktsütet. Chelsea atema Timo Werner, Kante nungeri goal idaktsütsü asoshi maongka

angu ajisüaka midaktsütet.

Chelsea pur asoshi asayamung tongtibangtiba ka nung asaya mezüngbuba shilem tembangtsü minute trok dang anunga lir Brazil nung centre-back Thiago Silva yirur tuguadokba ajanga parnok timtemi ai. Ajisüaka minute 3 dang lir Havertz-i goal ka idaktsü, koba asayamung akoktsü atema teperi liasü.

Kasa mapang nung City asoshia midfielder Kevin De Bruyne yiruru tuguadokba ajanga timtem tulu adok, kechiyong pa ya team nung asayar tongtibangtiba rongnung ka lir.

Asaya nung ball City puri timba belenshi ajisüaka parnoki goal midaktsütet. Mapang atakzükja aliba mapang tashi nung Havertz-i idaktsüba goal dak alaka telok anapronglai goal ka danga magütsüteti asaya tembang aser Chelsea-i takok angu.

Tuchel-i aniba Chelsea team-i hopta trok tsüngda City asemben kokogo.

Indian shooting team nung coach Jaspal adentsü

New Delhi, Monupii/ May 30 (Agencies): Taoba mapang India nunger shooter aser India junior shooting team pistol coach, Jaspal Rana Croatia nung oa national squad den adentsü terenemba lir. Training camp ka atema India shooting team Osijek nung oa lir aser aruya aliba Olympics atema Croatia nungi indang indanga Tokyo-i ayamesoa maodang, parnok taruba ita ISSF World Cup nung shilem agitsü.

Rana-i Bodhbarnü 'TimesofIndia.com' dang iba osang sangokja liasü.

"June 11, 2021 nü ayamesoa aotsü imlar," ta pai ashi.

India nung Covid-19 wara tanaben adoka, national camp ayongzüktsü asoshi timtem ajuruba ajanga, National Rifle Association of India (NRAI)-i Croatia kübok Osijek yimti nung iba camp ayongzüktsü telemtetba agi.

Mezüngbo, Rana den külem national coach ana - Ronak Pandit aser Samaresh Jung nungeri timtem kar ajanga iba training camp nung shilem magitsü lemtet. May 11, 2021 nü National squad pur tayimtsü nung Croatia-i ayamesoa ogo.

"NRAI tir Raninder Singh-i onok tebilemba teti angadanger aser pai onok dang kodanga ma ta mashir. Pai onok nem iba camp nung shilem agitsü shia aruogo. Ozü asempronglai India



ayamesoa aotsüla," ta Dronacharya award ngur alisang Rana-i ashi.

ISSF World Cup asayamung ya Osijek nung June 22 nungi July 3, 2021 tashi asayatsü. Aji masüdag, tejaoker team ka ama European Championships tawabangba kübok Indian shooter tem MQS (minimum qualification score) category nung shilem tagidak lir.

Iba Shooting World Cup temer, Rana India squad den Olympics nung shilem agitsü atema Tokyo-i ayamesoa aotsü.

Ano külen, Pandit-a India indang pistol coach tekolakba, Pavel Smirnov den Croatia-i ogo.

Visa renemtsü inyakyim dak sendakba nung maparen menoba ajanga Smirnov India team den külemi Croatia-i motet.

Honibar anepdag, Pandit aser Pavel naprongla ayamesoa ogo. Jung-a June 06, 2021 nü ayamesoa aotsü sentong lir.

Maneni, aruya aliba Tokyo Olympics nung coaching staff timbaka team den külemi amungtsü imlar. Osang ajanga angazükba agi, Smirnov aser rifle coach Oleg Mikhailov naprongla iba Games tatem tashi team den külemi amungtsü. Kasa mapang tanüngba coaching staff tem melentepa maparen lezmzütsütsü akok.

nungang team pur training agidaktsünüa liasü," ta Rana-i ashi.

Ajisüaka, Rana-i iba camp nung shilem agitsü mulungtetba sülen, pai Croatia nung team den adentsü terenemba lir.

"May 27, 2021 nü Visa agütsütsü atema May 25, 2021 nü kü dang document tem agütsütsü asoshi asüngdag, saka iba maparen inyaktü atema mapang kanga dang petakra liasü, kechiyong visa atema nüngdakba document ajak bendentsüla aser tang ama tensa ka nung Delhi tashi senzüsenbongtsü memulungi liasü," ta Rana, shiba tang Mussoorie nung lir, pai ashi.

"Hombarnü (31.05.2021) visa atema maparen ataloktsü imlar. Team nung madandang, Osijek nung anogo 7 quarantine' nung amungtsü asünung, taruba ita 11 mesüra 12 nungbo ni

Israel nung Benjamin... (Tapak 8 nungi...)

Anogo ishika Bennett ya inyaka alisang Bennett yagi yimjak nung ola madoki arur, aser Likud party tekolakba Netanyahu-i Hokulbarnü tweet ka aser video ka ajanga pa kümsük tatem kati arur ta sayua liasü. Pai "Chichiba tekumdangtsü" ta Twitter nung zülua lendong aketba "left-wing" administration arurtsü akok, ta tekumdangtsü metetdaksü.

Yamina ya ato kilongser ka ama mezüng inyaker centrist Lapid nem amoktsütsü atema tezüngzüktep ka agiogo, ta osangtem temai adokba sülen, Bennett-i legislator tem ajurua Deobarnü osang agütsütsü, ta Yamina-i Honibar aonung sangdonga liasü.


2009 küm nungi linük nung yimsü süa arusang right-wing lenir arishi küm 71 tain Netanyahu atsüngdoktsü atema taoba mapang defence minister

inyaka alisang Bennett yagi taoba mapanga merangogo.

May 10 nü Gaza nung Israel aser Hamas tsüngta rara metenzükdag Lapid den tezüngzüktep yangluogo ta osang liasü, saka iba rara mapang Bennett-i centre aser left den teloktep sorkar ka tentettsü merangba maparen yutsür, ta sangdonga liasü.

Ajisüaka tang ceasefire benoka lia tawa ano Israel nung Palestine nübur aser Yihuda (Jews) nunger tsüngta azüdokshitepba ajanga Lapid-Bennett tesendaktep yanglushitsü akok.

Arishi küm 57 tain Lapid-i Bodhbarnü tashinung sorkar ka mesangdongtetra, 2019 küm April ita nungi tenzüka Israel nung election pongububga agitsü, koba Bennett-i maginer, ta shia lir.



Las Vegas nung WBC lightweight title boxing asaya ka nung Chantelle Cameron-i Melissa Hernandez akokba sülen tangokba yangi angur.

BILEMDANGANG

"Alar ama inyakang aser chuba ama chiyongang."